

# Nov guid d'architectura davart la «chasa grischa»

■ (cc) In onn suenter che la restauraziun externa da la chasa grischa a Cuira è terminada cumpara in guid d'architectura davart la sedia da la regenza grischuna. La publicaziun «Das neue Gebäu in Chur», che po vegnir cumprada a partir d'immediat en las librerias, è l'emprim numer d'ina retscha davart monuments architectonics grischuns ch'è vegnida iniziada da la Tgira chantunala da monuments. L'anteriura chasa signurila en la Reichsgasse a Cuira serva dapi la fundaziun dal chantun l'onn 1803 sco sedia da la regenza. Il «Neues Gebäu» è vegnì costruì l'onn 1752 da l'uffizier Andreas von Salis, in descendant dals von Salis da Soglio. Ensem cun il «Altes Gebäu» da ses cusrin Peter von Salis ha el mess il cuntrapunent urban a la retscha dals edifizis rurals dals von Salis il 18. tschientaner. Cun sia cumparsa ritga a l'intern – che correspunda dal tuttafatg a sia classa sociala – e cun sia apparientscha subtila vers anora è il «Neues Gebäu» in exempel tipic per ils edifizis da la classa superiura grischuna da quel temp. Oz vala il «Neues Gebäu» senza dubi sco in dals edifizis ils pli impurtants dal temp dal rococo sin terren grischun.

La restauraziun externa che ha gù lieu l'onn passà è stada la chaschun per la Tgira chantunala da monuments da prender per mauns ina publicaziun davart quest edifizis. Cun texts e cun maletgs preschenta il nov guid d'architectura las differentas localitads fascinantas da l'edifizis. Quai vala er per la sala da la regenza en il 2. plaun da l'edifizis, nua ch'i vegnivan er tegnidas fin l'onn 1878 las sesidas dal cussegl grond. La publicaziun cumpiglia tut en tut 40 paginas. La regenza grischuna ha su-

stegnì l'ediziun da la publicaziun cun meds finanziaals dal fond da lottaria.

## Team da redacziun competent

Per elavurar il cuntegn ha pudì vegnir engaschà in team da redacziun competent: cooperà han *Ursula Jecklin*, *Diego Giovanoli* e *Marcus Casutt*. L'istoricra Ursula Jecklin ha manà l'archiv da la citad da Cuira ils onns 1977 fin 2006. Ella ha redigì differentas publicaziuns davart l'istorgia da la citad da Cuira e davart l'istorgia grischuna da las dunas e da las schlattainas. Diego Giovanoli è stà durant blers onns collavuratur da la Tgira da monuments dal Gri-

schun. Dapi l'onn 2001 lavura el sco perscrutader e publicist independent. El ha redigì numerusas publicaziuns davart ils abitadis e davart ils edifizis en il Grischun. L'istoricher d'art Marcus Casutt è tgirader da monuments dal chantun Grischun.

## Emprim numer da la nova retscha davart monuments architectonics

Il guid d'architectura cun il titel «Das Neue Gebäu in Chur» è l'emprim numer d'ina nova retscha davart monuments architectonics grischuns ch'è vegnida iniziada da la Tgira da monuments dal Grischun. Cun ses format

pitschen porscha il guid practic la pussaivladad da preschentar edifizis particulars dal chantun en furma monografica. Las publicaziuns ch'èn planisadas en libra successiun sa drizzan a la populaziun indigena, ma er als giasts dal chantun.

Il nov guid d'architectura po vegnir cumprà a partir d'immediat per 9 francs tar la tgira da monuments u en las librerias.

**Marcus Casutt, Diego Giovanoli, Ursula Jecklin: Das Neue Gebäu in Chur. Das Regierungsgebäude des Kantons Graubünden, genannt «Graues Haus», Cuira 2010, ISBN: 978-3-9523369-7-7.**



Marcus Casutt, tgira da monuments, Claudio Lardi, cussegljer guvernativ e Claudio Riesen, chanzelier chantunal (da san.) han preschentà la nova ovra.